

LEWIS, LEWIS WILLIAM ('Llew Llwyfo ' ; 1831 - 1901), bardd, nofelydd, a newyddiadurwr

PDF Generated on: Thu, 08 Sep 2022 02:36:35 +0000

<https://yba2-prawfweb-prawfdata.llgc.org.uk/article/c-LEWI-WIL-1831>

Enw: Lewis William Lewis

Ffugenw: Llew Llwyfo

Dyddiad geni: 1831

Dyddiad marw: 1901

Rhyw: Gwryw

Galwedigaeth: bardd, nofelydd, a newyddiadurwr

Maes gweithgaredd: Eisteddfod; Llenyddiaeth ac Ysgrifennu; Barddoniaeth; Argraffu a Chyhoeddi

Awdur: David Gwenallt Jones



Ganwyd 31 Mawrth 1831 ym mhentref Pensarn, Llanwenllwyfo, sir Fôn. Bu'n gweithio pan oedd yn fachgen yng ngwaith copr Parys, ger Amlwch; bu'n brentis gyda brethynnwr ym Mangor; cadwodd siop ei hun, ar ôl hynny, yn Nhalsarn, ac ysgol wedyn yn yr un lle. Yn 1852 yr oedd yn is-olygydd *Y Cymro* (Holywell); yn 1855 symudodd i Lerpwl i olygu'r *Amserau*; yn 1858 aeth i Aberdâr i olygu'r *Gwladgarwr* a'r *Glorian*; wedi hyn aeth i Ddinbych ar staff *Y Faner*, ac oddi yno i swyddfa *Herald* Caernarfon. Bu hefyd mewn cysylltiad â'r *Gwron*, *Gwalia*, a'r *Genedl*. Yn 1870 aeth drosodd i America, a bu yno am tua phedair blynedd, a bu'n gyd-olygydd newyddiadur Cymraeg, *Y Wasg*. Aeth i America yr eil tro. Bu ef ac eraill yn cynnal cyngherddau yng Nghymru ac America, ac yr oedd 'Llew Llwyfo' yn ganwr ysgubol. Yr oedd hefyd yn arweinydd eisteddfodol. Ef, efallai, oedd y gwr mwyaf amryddawn yn y ganrif ddiwethaf. Bu farw 23 Mawrth 1901 yn y Rhyl, a chladdwyd ef ym mynwent Llanbeblig, Sir Gaernarfon.

Bardd yr arwrgerddi oedd 'Llew Llwyfo.' Enillodd ar 'Gwenhwyfar' yn eisteddfod Merthyr Tydfil, 1859; ar 'Caradog' yn eisteddfod genedlaethol Aberdâr, 1861; 'Llewelyn' yn eisteddfod y Rhyl, 1863; 'Dafydd' yn eisteddfod genedlaethol Aberystwyth, 1865; 'Arthur y Ford Gron' yn eisteddfod genedlaethol Caer, 1866; 'Elias y Thesbiad' yn eisteddfod Rhuthyn, 1868; 'Gruffydd ap Cynan' yn eisteddfod genedlaethol Wrecsam, 1888; 'Ioan y Disgybl Anwyl' yn eisteddfod genedlaethol Llanelli, 1895; a chafodd lu o wobrau llai pwysig yn eisteddfodau Cymru ac America. Dyma ei brif gyhoeddiadau: *Awen Ieuanc*, 1851; *Llewelyn Parri: neu y Meddwyn Diwygiedig* (nofel), 1855; *Huw Huws neu y llafurwr Cymreig* (nofel), 1860; *Llyfr y Llais*, 1865; *Troadau yr Olwyn*, 1865; *Gemau Llwyfo*, 1868; *Y Creawdwr. Cerdd ddysg (didactic poem)*, 1871; *Cyfrinach Cwm Erfin*, a *Y Wledd a'r Wyrth* (dwf nofel; diddyddiad); *Buddugoliaeth y Groes* (arwrgerdd), 1880; *Cydymaith yr herwheliwr: neu a gollwyd ac a gafwyd. Chwedl Wledig*, 1882; *Drych y Prif Oesoedd ... ynghyd a rhagdraith gan Llew Llwyfo*, 1883; *A Selection of Sacred and Secular Lyrics from the Welsh with English versions*, by Llew Llwyfo.

Awdur

David Gwenallt Jones, (1899 - 1968)

Ffynonellau

Bywgraffiad Llew Llwyfo, yn llenyddol, cerddorol, ac eisteddfodol, wedi ei ysgrifennu ganddo ef ei hun (Llyfrau Ceiniog Humphreys Caernarfon)

ceir erthyglau arno yn *Y Geninen*, 1901, 1902, ac yn *Y Traethodydd*, 1911, 1921

Darllen Pellach

Erthygl Wicipedia: [Lewis William Lewis](#)

Dolenni Ychwanegol

VIAF: [2011842](#)

Wikidata: [Q13129535](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

